

He Ngohe Aromatawai ā-Roto Mō ngā mahi whakamahere anake

Te Ingoa o te Ngohe: Te Mahi Piupiu

Aronga: Pāngarau 1.1A

Paerewa Paetae: Pāngarau 1.1

Kaupae: 1

Whiwhinga: 6

He Tohutohu mā te Ākonga

I tēnei ngohe

I tēnei ngohe, ko tāu mahi he tātaitai i ngā hanga pāngarau mō te hokohoko piupiu hou mō tētahi kapa wharekura e whakarite ana ki te tū ki tētahi whakataetae kapa haka ā tērā marama. Ka mutu, ka tūhura koe i ngā āhuatanga me ngā tikanga o te mahi piupiu.

Te horopaki

E hiahia ana tō kura ki te hoko piupiu hou mō te kapa wharekura ka tū ki tētahi whakataetae kapa haka ā tērā marama. 40 katoa ngā ākonga kei roto i te kapa wharekura, ā, me mau i ia kaihaka tētahi piupiu.

He rerekē te roa o ngā piupiu mō ngā tama i ngā piupiu mō ngā kōtiro. Ka tū te whakataetae kapa haka ā tērā marama, nā reira, me tae mai ngā piupiu hou i mua i te rā tū.

Ko te 2:3 te ōwehenga o ngā tama ki ngā kōtiro i roto i tēnei kapa.

Anei ngā utu mō te hoko piupiu:

Piupiu kōtiro - 80 henemita te roa

Piupiu tama - 35 henemita te roa

E \$85 te utu mō ia 10 henemita ka tāpiri ai i te taketake hokohoko (GST) 15%.

Hei tā te whakapae a te pakihi mahi piupiu, ka 10 rā te roa kia oti i ngā kaimahi tokowhitu te whakarite me te whiri i te harakeke mō ngā piupiu roroa 15 me ngā piupiu poto 10.

Kia oti te whiri te katoa, he rua wiki anō kia mau i te piupiu tōna tae, kia oti anō te horoi me te whakamaroke i mua i te tuku ki te kura.

I mua i te tīmatanga o te mahi piupiu, me utu te 0.35 o te utu katoa hei moni tāpui (down-payment).

Hei mahi

- Whiriwhiria te rahi o te pūtea hei moni tāpui.
- Whiriwhiria te tokomaha o ngā tāngata kia oti ngā piupiu i te 30 rā.
- Whakamāramatia ētahi tikanga o te mahi piupiu.
- Whakaaturia ngā whiriwhiringa katoa, me ngā whakamārama i te taha ki te reo Māori.

Me whai koe ki te tūhura i ngā āhuaranga o te mahi piupiu:

- Ngā tikanga Māori kei roto i te mahi piupiu
- Te momo harakeke tika hei mahinga piupiu me te roa o te rau.
- Ngā tikanga kato i te rau.
- Te waihanga tauira ki te rau.
- Te maha o ngā rau ki tētahi piupiu.
- Te matū hei tūmau i te kano ki ngā rau.
- Te mahi muka/whītau.

Te Reo Matatini o te Pāngarau me te Horopaki

- Te whakamahi i te reo pāngarau e whaitake ana.
- Te whakamahi i ngā rautaki maha hei kōrerorero whakaaro pāngarau, arā, te tuhituhi, te mahi whakaari, ngā hangarau matihiko, te aha, te aha.

Ngā mahi hei tāpae

1. Me hanga i tētahi tauira hoahoa, tētahi tauira tūturu rānei. Kia kua e iti iho i ngā piu 10, ā, me whai hoahoa.
2. Me whakamahi i ngā tikanga tau whaitake.
3. Whakaaturia ngā whiriwhiringa katoa, me ngā whakamārama i te taha ki te reo Māori.

Kuputaka

moni tāpui down-payment